

■ PRO SVIZRA RUMANTSCHA

Lavur è stada difficila il davos onn

(fmr/gc) Sco quei che la presidenta da la Pro Svizra Rumantscha (PSR), *Barbla Etter*, scriva en il rapport è la lavur stada pli difficila 2020 causa il coronavirus. La radunanza generala, ch'era prevista per ils 13 da mars 2020, ha la PSR stuì dir giu ed ins n'ha era betg pudì fixar ina nova data.

L'onn passà ha la PSR publitgà in prototip dal «Pledarix» – in supplement per divers navigaturs. Quai correspundia a la pretensiu da la PSR ch'i dovria datas linguisticas colliadas ed accessiblas. Per quest onn èn anc plirs pass concrets en questa direcziun planisads tras la PSR.

La Lia Rumantscha (LR) ha elavurà ina strategia per il futur da sia lavur. La

PSR è s'engaschada ch'i dettia ina consultaziun publica concernent questa strategia ed ha era preni posiziun. Divers puncts da questa èn vegnids resguardads.

L'onn passà ha *Clau Dermont*, co-president da la PSR, disditg ses uffizi pervia d'in conflict d'interess, essend ch'el lavura ussa tar l'Uffizi da cultura e s'occupa da la promoziun da linguas.

La PSR ha fixà la proxima radunanza generala online sin ils 4 da zercladur 2021. – Suenter quella ha lieu ina discussiun davart «Sfidas cun la Rumantschia». Impuls vegnan a dar: *Diego Deplazes*, nov secretari da la LR, e *Clau Dermont*, col-lavuratur da la secziun cultura e societad da l'Uffizi da cultura.

■ SRG.R



Ina scena or da la seria da web rumantscha «Metta da fein».

FOTO RTR

Il cusseg dal public è cuntent cun «Metta da fein»

(cdm/fmr) L'emprima seria da web rumantscha «Metta da fein» ha pudì pervader il Cusseg dal public (CDP) da la SRG SSR Svizra Rumantscha (SRG.R). Quai scriva la societad purtadra dad RTR en ina comunicaziun a las medias, suenter sia sesida la pli recenta.

Il CDP fa en general in compliment per la seria ficziunala «Metta da fein» che mussia «bellas cuntradas, in mund che para dad esser en urden e lura l'istorgia «schräga» cundida cun orrur, ma er cun bler umor.» Uschia haja la seria era gi success sur ils cunfins rumantschs ora, ella saja sa posiziunada tranter las diesch contribuziuns guardadas il pli savens sin Play Suisse, durant las emprimas emnas che quella plattafurma era vegnida lantschada. Betg plaschì al CDP ha l'ultima part,

ina part che saja stada pulitmain costruida e per part lungurusa. Tuttina giaschiss il CDP ina cuntinuaziun da questa seria u dad in format sumegliant.

Bunas notas da vart dal CDP datti era per la nova plattafurma Play Suisse da la SRG SSR e ses cuntegns. Unic punct da critica è la funcziunalitad da retschertga.

Sco ulteriura emissiun dad RTR ha il CDP discutà il nov format cun il num «Veni Vidi Venderdi». I sa tracta dad ina discussiun libra da trais persunas che dattan in sguard enavos sin l'emna. Il CDP crititgescha tar quest'emissiu ch'i manchia per part il «flow» u il schlantsch.

Il CDP è in gremi dal public che accumpogna regularmain ils puncts da program dad RTR.



FOTO GION NUTEGN STGIER

— FMR |

Redactor/a per il Grischun Central (50–100%)

Vus lavurais en ina pitschna squadra da la nova FMR che realisescha cuntegns medials rumantschs en furma da texts, maletgs ed entiras paginas da gasettas.

Vossa lavur

Vus realisais cuntegns schurnalistics – vos retschertgais, scrivais e publitgais texts e faschais fotografias per ils chanals medials da la FMR (tranter auter las gasettas Pagina da Surmeir, La Quotidiana u Posta Ladina).

Vus lavurais en stretg barat cun l'entira squadra redacziunala e cun il schefredactor da la FMR.

Vus essas co-responsabel/la surtut per la rapportaziun dal Grischun Central.

Lieu da lavur: Grischun Central

Vossas cumpetenzas

Vus discurreis e scrivais en l'idiom surmiran.

Vus avais gia fatg experientschas u scolaziuns en il schurnalissem u en champs sumegliants.

Vus avais plaschair ed interess da scriver rumantsch.

Vus essas ina persuna cun viv interess per quai che capita en il Grischun ed a nivel regional.

Vus savais lavurar bain en atgna reschia, sin atgna responsabladad ed era sut squitsch da temp.

Vus avais enconuschientschas da rumantsch grischun u essas pront/pronta d'emprender quel.

Tramettai p.pl. Voss'annunzia cun tut la documentaziun en furma electronica enfin ils 28 da matg 2021 a: david.truttmann@fmr.ch (Fundaziun Medias Rumantschas, Via da Masans 2, 7000 Cuira, 081 544 89 10).

La «Tavla Naira»

■ (fmr) La Quotidiana porscha ina «Tavla naira». Las tavlas nairas èn u eran pli baud las affischas cun tut las infurmaziuns uffizialas, da naschientschas enfin mortoris, cun avis ed infurmaziuns da la vischnanca u da societads communalas. Tar la «Tavla naira» da La Quotidiana sa tracta era dad in «plaz cumin», dad ina part da la gasetta betg

realisada da la redacziun FMR, mabain creada cun contribuziuns inoltradas da lecturas e lecturs: opiniuns, forum, necrolog, fotografias etc. Las contribuziuns ston esser signadas cun num da l'autur u da l'autura. I vegnan publitgadas mo contribuziuns rumantscha e talas che sa tegnan vi da la buna maniera. Las contribuziuns na vegnan betg in-

demnisadas cun in onurari. La redacziun FMR selectescha e redigia tenor basegn.

Vossas contribuziuns pudais trametter a la redacziun FMR: redacziun@fmr.ch, ubain per posta: FMR, Fundaziun Medias Rumantschas, Via da Masans 2, 7000 Cuira.

■ TAVLA NAIRA

En scola astga ins buca motivar affons per la catscha

Varga 40 onns hai jeu dau scola. En quei temps hai jeu dau fetg bia lecziuns da historia naturala. Il plan d'instrucziun vegl cunteneva in tschuppel animals selvadis e dumiastis ch'ins saveva prender atras. Tgei che vegneva instruiu en quella lecziun dependeva per gronda part dalla preferenza dil scolast. Jeu concedel bugen che jeu hagi dau dapli peisa alla fauna che alla flora. Sco catschadur hai jeu giu ina predilecziun per ils animals selvadis. Jeu sun sestentaus da mussar la bellezza da nossa fauna e da nossa bellezza flora. Pliras gadas hai jeu tractau il capricorn ni il tschëss-barbet per mussar co ins sa ragischar ora sorts animals. Omisdus ein dus animals fascinonts cun ina fetg interessanta moda e maniera da viver. Ils scolars han era intervegniu tgei idealissem e tgei stentas ch'ei drova per saver reintrodur animals ragischai ora en nossa tiara. Dils cuosts gnanc da tschintschar. Nus essan era sedumandai tgei che nus savessen far per

segidar cun animals che ein en pitgiras ni en prighel da vegnir ragischai ora.

Igl ei mai stau mia finamira da motivar ils affons per la catscha. Co less ins pomai controllar, sche in scolast/ina scolasta motivescha ils scolars/las scolaras per la catscha? Tgei ei insumma motivaziun per la catscha? Tonscha ei da tractar in animal selvadi d'entginas lecziuns da historia naturala? Tonscha ei sch'il scolast/la scolasta legia ina biala historia da catscha? Tonscha ei sche la persuna d'instrucziun fa ina spassegiada ella natira cun sia classa? La febra per la catscha survegnan ils affons oravontut en lur famiglias ni da camerats/cameratas.

El plan d'instrucziun 21 vesa ei ora auter. Pil scalem primar ei nudau gnanc in animal, ni dumiesti ni selvadi, ch'ins savess prender atras. Ils cudischs da lectura per la scola cuntengnan praticamein nuot che ha da far zatgei culla catscha. Ozildi vegn dau peisa ad autras temati-

cas. Jeu depluresch ch'ins ha bandischau da quella causas ord nossas stanzas da scola. La catscha ei ina part da nossa cultura. En nies temps dat ei massa persunas che ein encunter la catscha. Mintga motiv – aunc schi pigns – ei buns avunda per dar ellas costas alla catscha ed allas catschadurs ed als catschadurs. Puspei munglass jeu schar scriver avon da persunas che han da far nuot culla scola tgei che jeu astgi instruir. Tgei che quella persunas vulan ei pli che clar. La finamira ei d'abolir la catscha. Ils iniziants pretendan ina massa, sezs porschan els praticamein nuot per ademplir lur pretensiuns. Cun quei hai jeu gronda breigia. Perquei ditgel jeu NA alla iniziativa da catscha.

Venanz Nay, Zignau

**LA QUOTIDIANA**  
 Editura: Samedia Press AG  
 Editor: Hanspeter Lebrument  
 CEO: Thomas Kundert

---

**Editura Samedia**  
 Via Sommerau 32, 7007 Cuira;  
 tel. 081 255 50 50,  
 mail: verlag@samedia.ch

---

**Redacziun responsabla:**  
 Fundaziun Medias Rumantschas (FMR):  
**Schefredactor FMR:** David Truttmann (dat)  
**Substitut schefredactor FMR:**  
 Martin Cabalzar (mc)

**Redacziun FMR:**  
 Augustin Beeli (abc), Andreas Cadonau (ac),  
 Carmen Monn (cm), Daniela Derungs (dd),  
 Flurin Andry (fa, correctorat),  
 Gabriela Desax (gd, correctorat),  
 Annatina Felli (afi), Hans Huonder (hh),  
 Matia Demarmels (md), Nadja Lucchinetti (nl),  
 Sandro Buchli (sb), Susi Rothmund (sr),  
 Andri Netzer (an), Angelica Augustin (aa),  
 Martin Gabriel (mg), Tanja Augustin (ta).

---

**Adressas redacziunalas:**  
 FMR Fundaziun Medias Rumantschas,  
 Via da Masans 2, 7000 Cuira, tel: 081 544 89 10  
 mail: redacziun@fmr.ch

---

Surselva: tel. 081 544 89 18,  
 mail: redacziun@fmr.ch  
 Engiadina: tel. 081 544 89 16,  
 mail: redacziun@fmr.ch  
 Grischun Central: tel. 081 544 89 17  
 mail: redacziun@fmr.ch

---

**Servetsch d'abunents e da distribuziun:**  
 Via Sommerau 32, 7007 Cuira,  
 tel. 0844 226 226,  
 mail: abo@samedia.ch

---

**Inserats:**  
**Samedia Promotion,**  
 Städtlistrasse 12, 7130 Glion  
 tel. 081 920 07 17, fax 081 920 07 18,  
 mail: ilanz.inserate@samedia.ch

---

La Quotidiana cumpara tschintg giadas ad emna  
**Ediziun derasada, Südostschweiz cumplet:**  
 69 795 exemplars (WEMF, 2020)  
 Derasaziun: 161 000 lecturas e lecturs  
 (MACH-Basic 2021-1)

---

**Pretschs d'abunaments sut:**  
 www.suedostschweiz.ch/aboservice

---

**Comunicaziun da participaziuns considerablas  
 sin fundament da art. 322 CP:**  
 nagin

---

© Samedia